

REGLUR um lögregluráð.

1. gr.

Ríkislögreglustjóri skal starfrækja lögregluráð. Í því eiga sæti auk ríkislögreglustjóra, aðrir lögreglustjórar, þ. á m. héraðssaksóknari, sbr. 6. gr. lögreglulaga nr. 90/1996.

Lögregluráð skal hafa forgöngu um að boða aðra aðila, þ. á m. dómsmálaráðherra og starfsmenn ráðuneytis hans, til funda ráðsins, eftir því sem tilefni er til, til að ræða einstök mál er varðar málefni lögreglunnar.

2. gr.

Lögregluráð skal vera formlegur samstarfsvettvangur lögreglustjóra á Íslandi. Hlutverk þess er að efla samstarf og samráð á meðal lögreglustjóra, m.a. á sviði stefnumótunar. Ráðið tekur hins vegar hvorki stjórnvaldsákvæðanir né aðrar bindandi ákvarðanir.

3. gr.

Markmið lögregluráðs er að samræma og samhæfa störf lögreglu með það að leiðarljósi að tryggja hagræðingu, framþróun, fagmennsku og öryggi í starfsemi lögreglunnar.

4. gr.

Ríkislögreglustjóri er formaður lögregluráðs. Hann boðar til funda í ráðinu, leggur fram dagskrá funda að höfðu samráði við lögregluráð og heldur fundargerðir. Jafnframt sér hann um samskipti við fjölmiðla varðandi upplýsingagjöf um starfsemi lögregluráðs. Óski lögreglustjóri eftir því að koma tilteknu máli á dagskrá skal ríkislögreglustjóri verða við því berist ósk um það með hæfilegum fyrirvara, sbr. 2. mgr. 6. gr.

Ráðherra getur óskað eftir því að ríkislögreglustjóri, í samráði við lögregluráð, vinni tillögur um ýmis mál, t.d. vegna undirbúnings lagabreytinga og setningu reglugerða.

5. gr.

Ríkislögreglustjóri fer með málefni lögreglunnar í umboði dómsmálaráðherra skv. 4. gr. lögreglulaga og flytur lögregluráði boð hans og fyrirmæli. Hlutverk og starfsemi lögregluráðs hefur ekki áhrif á þá ábyrgð sem lögreglustjórar bera samkvæmt lögreglulögum eða öðrum lögum sem þeim ber að starfa eftir.

6. gr.

Fundi í lögregluráði skal að jafnaði halda einu sinni í mánuði og leggur ríkislögreglustjóri fram áætlun um fundahöld til hálfes árs í senn. Lögregluráð getur þó fundað oftari ef þurfa þykir.

Dagskrá fundar og þau gögn sem til stendur að ræða á fundum ráðsins skulu liggja fyrir með hæfilegum fyrirvara og að jafnaði eigi síðar en tveimur dögum fyrir áætlaðan fundardag.

7. gr.

Á fundum lögregluráðs skal rætt um samstarf innan lögreglu, samræmingu verklags, framþróun og stefnumótun.

Almennt skal ríkislögreglustjóri leita samráðs við lögregluráð og upplýsa ráðið um eftirtalin verkefni:

- a) Stefnumótun lögreglu.
- b) Samræmt verklag lögregluembættu, t.d. við setningu verklagsreglna.
- c) Ákvarðanir um sameiginleg útboð, ráðstöfun fjármagns vegna sameiginlegra verkefna og rekstur tækja lögreglu.
- d) Framkvæmd löggæsluáætlunar.
- e) Ákvarðanir um að fela einstökum lögreglustjórum verkefni á landsvísu.
- f) Viðfangsefni sem kalla á miðstýringu eða samhæfingu á landsvísu.

- g) Tillögur um hagræðingu, samræmingu, framþróun og öryggi í starfsemi lögreglunnar.
- h) Önnur verkefni sem ráðherra, ríkislögreglustjóri eða aðrir lögreglustjórar óska eftir að rædd verði í lögregluráði.

Almennt skulu lögreglustjórar leita samráðs við lögregluráð og upplýsa ráðið um veigamiklar ákvarðanir og önnur mál sem eðli máls samkvæmt geta haft áhrif á starfsemi lögreglunnar í heild eða á framkvæmd lögreglustarfa á landsvísu.

8. gr.

Náist ekki samstaða um einstök mál í lögregluráði sem geta haft umtalsverð áhrif á starfsemi lögreglunnar í heild eða á framkvæmd lögreglustarfa á landsvísu, skal ríkislögreglustjóri tilkynna um það til ráðherra, og eftir atvikum ráðfæra sig nánar við hann um málið, áður en ákvörðun er tekin.

9. gr.

Ríkislögreglustjóri skal senda dómsmálaráðuneyti og lögreglustjórum allar fundargerðir ráðsins eins fljótt og auðið er eftir hvern fund.

10. gr.

Ríkislögreglustjóri getur sett nánari verklagsreglur um starfsemi lögregluráðs.

11. gr.

Reglur þessar eru settar samkvæmt heimild í 43. gr., sbr. 3. mgr. 5. gr. og 7. mgr. 6. gr. lög-
regluglaga nr. 90/1996, með síðari breytingum, og öðlast þegar gildi.

Dómsmálaráðuneytinu, 13. mars 2020.

Áslaug Arna Sigurbjörnsdóttir.

Haukur Guðmundsson.